

Fìch e òa a cà di noni

Töcc i agn,
quando s'ère bòcia,
la me mama, santa dòna,
la me spedia
finit la scòla
dai me noni contadi
en "Val del Fich"
frasiù de Ciüdü,
cömü dela Basa
en Val Caalina.

Adès i la ciama
"vacanza intelligente,
agriturismo scolastico"
ma per la me mama
el vùlia di
liberas per ü per de mis
d'òna teribile peste
compàgn de me.

Sveglia al canto del gal,
òna scödèla de polenta e
lacc
po' via de corsa, a pe nüt,
a guarnà i ache,
porta vià ol rüt
e mpieni la trais de fe.

Dopo, söl car tiràt di bö,
ndi càp a taià ol melgòt,
sfoial, po' tacàl sö
ai traf del legn del
portech
a fàl secà.

Gh'è de daga ol solfer
ai filar dela it,
- L'òa l'è maruda ! -
el sentenza ü bel de
ol me nono Giòp.

- L'è ura de vendemià -
L'era òna gran festa !
I rias i scete de montagna
che i cantaa contete
intàt ch'i lauràa,
e la sira, sö l'era,
dopo la pèsta di grate,
i balàa alegre



coi zuegn dela contrada.

Piö tarde, stöf 'ndacc,
al ciar dela löm
sprofondae in del paiù.
Dò gratade dè pölès
e me se ndormentae dè colp
a sognà la me cà aSan
Gioan,
i me cari genitur
e töcc i me amis de scòla.

S'ere en vacansa,
ma per me la fadiga,
a cà di me noni,
l'era pròpe tròp tanta.

I momènc piö bei
de töta sta storia ?

L'era quando fae scapà
cuni e galine,
pisae zo dala lobbia,
ghè scundie la pipa al nono
o saltae sö
la pianta de fich
con d'òna fèta
de polenta frègia,
a sircà fò i piö gròss
per fa la colasiù.

La me nona Batistina,
anche le santa dòna,
sota la pianta de fich
semper piö spaentada,
- Mario, sta atent
de mia borlà zo.
E mangia ch'i piö marücc
ch'i è piö bù
perché quei amò zerb
i te farà ciapà
la grataröla o schitù ! -.

Mario Giupponi